

忠
裕
堂
集



忠
裕
堂

集

申涵盼 著

中
華
書
局

叢書集成初編

忠裕堂集

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘二〇九二毫米三十二分之二

統一書號：一七〇一八·一五一

此據畿輔叢書本
排印初編各叢書
僅有此本

原序

予爲童子。嘗慨然曰。人生讀書。舉進士成名。於皆足矣。至於一命之榮。皆足自效。而何擇焉。既長。游京師。見官禁院爲天子貴近臣者。裘馬翩翩。意氣自得。又慨然曰。官必至翰林而始榮也。及讀古人書。見饒思公言。朝廷之官。皆可雜以他才處之。唯翰林學士。非文章不可。又慨然曰。翰林之所重者在此。而不專以向之所云也。自古翰林而能文章者。莫如歐陽修。蘇軾。故其文旣取重於當時。復流傳至今日。雖妄愚人不知文義者。無不能道其名字。予思二公。卽非翰林。其文亦必可貴。苟第以翰林爲榮也。則自古及今。可榮者。何獨二公也。申子隨叔。連第春官。官翰林檢討。日刻苦爲文。自記傳書序。以及碑銘雜著。體無不備。詞無不工。豈非不以向之所云者爲榮。而有慕乎二公之所爲者耶。然吾又聞二公當日經濟與文章相表裏。他不具述。卽如歐公通進一書。嫋嫋千餘言。反復利害。洞悉事機。而蘇公上神宗一書。亦嫋嫋千餘言。痛陳皆政。骨鯁之氣。凜然筆端。他日二公之建樹。卒能如其書之所言。今隨叔將第於其文求之乎。於此亦豈有意乎。如予者。連因公車。近始得一如童子皆之願。而願瞻玉堂。如在天上。雖亦慕二公之文。豈亦擬其所爲書欲上之天子。而林泉偃蹇。其路無由。今隨叔既有其才。又居其地。深願隨叔審處之也。予與隨叔同舉孝廉。十年以來。朋友之愛。過於弟昆。故於其文不以爾而以規者。竊欲附古人之誼。相與有成。知隨叔之不我棄也。噫。隨叔豈可量哉。

昆陵年弟陳玉璫叔峰撰

忠裕堂集

恭應

永年申涵盼著

殿試制策一道

臣聞開創固難。守成更難。非真守成之難於開創也。開創之君。應運崛起。百戰而有天下。迨乎登五位。總萬幾。其於民情風俗吏治兵戎之事。習之已熟。故倉卒無過舉。卽禮樂文章。間有未備。尙可以藉口草創。待諸後人。守成之君。席祖宗舊業。端拱稱朕。日不辨稼穡。足不履畎畝。手不程衡石。身不親行陣。行一事而利害相半。任一官而賢否未分。卽夙夜冰兢。不遑日昃。尙有履盛危明之懼。況乎晏安是耽哉。是以開創多由於天授。而守成全恃乎人力。開創之難。其事顯而易見。守成之難。其機隱而易忽。開創者知守成之難。則規模宜定。守成者知開創之難。則紹述爲先。若恃明作之才。而弁髦乎故典。紛更之下。必致叢奸。天下被多事之害。耽因循之習。而株守乎舊章。叢脞之餘。必至滋玩。天下深無事之憂。試觀三代而下。漢唐宋之立國。初政皆有可觀。而嗣服者數百年間。僅傳文景貞觀慶歷數君。故曰守成難於開創也。欽惟皇帝陛下。具大有爲之略。存不忍人之心。定九鼎於乾符。豫唐堯之八歲。體一元於離照。富周成之五齡。祿鳥衍長祥。應五百年興王之運。鑄京承燕翼。繼十八載太平之基。登極數月以來。良法美意。次第舉

行固已祇承先猷。茂登上理矣。然猶聖慮周祥。俯垂清問。誠古帝王咨嘯訪洛之虛懷也。臣竊伏蓬藿。志願輸忠。凡生平之聞見。有知焉而不敢言。言焉而不敢盡者。今幸對天顏於咫尺。敢不借箸前籌。對揚休命於萬一乎。臣聞天生萬物。不能自理。而命聖人以理之。故書曰。作之君。作之師。克相上帝。寵綏四方。是知君者天之子也。民之主也。百神庶績之所受裁也。夫以一人之身。居九重之上。而爲天之子。民之主。百神庶績所受裁。其任可謂重且大矣。況皇帝當臨御之始。天命眷顧方新。人心仰望倍切。治忽否泰之機。固不容髮。而太祖之鴻基。太宗之偉業。以及世祖之創造艱難。胥此焉繫。誠不可不慎厥初矣。粵稽古昔。其君臣告戒。率留意於正始之謨。董仲舒則策天人。王吉則論風化。匡衡則崇德政。賈禹則勸節儉。至於魏徵之十漸。司馬光之三劄。程顥稽古正學。朱熹誠意正心之說。雖言人人殊。而皆上關君德。下裨民生。似宜奉爲龜鑑。第已往陳言。難以膠執。譬之醫然。古方恐未當於時症也。伏讀制策有曰。繼治之道。首重典章。今紀綱法度。雖已彰明。然因革損益。豈無順時制宜者。何如酌定章程。以爲萬世之規。與臣聞從古無百年不變之法。聖人有隨時通變之權。忠質文之異尚。寅子丑之異時。賁助微之異制。非夏商周惡同而好異。時爲之也。時在則易地皆然也。今之紀綱不患不明。而患在廢弛。法度不患不立。而患在玩愒。朝下一令。而暮已更矣。彼用一例。而此復歧矣。品級考屢易。而未見畫一。賦役全書頻頒。而未見奉行。車服混淆。貴賤莫辨。軍需那借。庚癸時呼。訟獄有覆盆之冤。河工爲築舍之計。六部大臣。膺高爵。糜厚祿。徒循故事。以文移相往復。有無一實心任事之臣。夫官納於邪。吏售其奸。民無所措手足。卽行之一時。尙無定

見又何有於萬世哉。爲今之計。非懲創而振刷之不可。古云。有治人。無治法。世祖十八年間。何法不備。卽以懲創振刷。爲順時制宜之妙用可矣。伏讀制策有云。閭閻愉悖。視吏治汚降。風俗淳龐。由人心邪正。誠端本窮原之要論也。百寮庶司。莫非爲斯民請命。而最切者則惟守令。故漢明帝言。郎官非其人。則殃民。唐元宗自擇知州刺史。蓋守令父母也。民猶子也。子有痛癢憂患。則父母亦從而痛癢憂患之。今且竭其膏血矣。攘其貲財矣。戕其性命矣。人非無良。胡此其極。必流品之未清也。勸懲之未當也。不則上而監司。而督撫。有中制之者也。有迫挾之者也。反此數者。而痛癢憂患相關矣。痛癢憂患相關。而民自父母視之矣。守令皆賢。卽異時耳目喉舌之選。不但益於百姓也。雖然。今日之百姓。亦不古久矣。庸虞之世。民多愚。愚則教化易入。秦漢之世。民多智。智則狙詐日生。非愚也。風俗之厚也。非智也。風俗之薄也。夫民爲邦本。而可自聽其厚薄哉。其所以厚薄者。人心爲之也。人心奢則好利。險則好訟。逸則好淫。戾則好亂。延染因循。遂成積重難返之勢。誠重學校以勸君子。嚴法令以制小人。人自蒸蒸丕變。日趨於古矣。若夫月吉縣書。畫地爲獄。此上古之治法。今不可行也。至於我國家定業戡亂。資於師武臣之力居多。今制策又諄諄以此下詢。可謂安不忘危。聽鼓擊而思將帥矣。夫取人之膂力性命。而試之於干戈鋒鏑之間。其事危且難。使不有操縱駕馭之術。其孰肯效死爲國。臣儒生也。不知兵事。然嘗按諸古法。得其一二。竊謂漢人與滿洲不同。滿洲皆從龍勛舊。宜永帶礪之盟。位不妨在諸文臣上。漢人非起於行伍。則試之郡縣。皆無藉者。以從戎爲借徑。若賞格節制。等於開國初發文武並重之說。久且武日重而文日輕。唐之藩鎮可鑒也。

陸賈有言。將相調和。則士豫附。滿漢固宜一體。新舊亦應異制。但可使文武有相維之法。不可使文武有相凌之勢。至嚴賞罰。勤訓練。古法具在。固可按籍而得之矣。凡此皆守成之要務。今日之時宜也。抑臣更有進焉。堯兢舜業。禹惜陰。湯日躋。文武緝熙執競。乃成二帝三王之治。是知本原之地在朝廷。朝廷清明。則天下熙皞。皇帝欲培君德。莫如勤聖學。勤聖學莫如開經筵。經筵一開。日與儒臣相討論。明古今之得失。籌天下之利病。尊所知而力行之。於是定紀綱。立法度。清吏治。正人心。偃武修文。垂之萬世。無難矣。伏願皇帝深留聖意。不棄芻蕘。節取一得。以裨法祖承天之萬一。則宗社幸甚。生民幸甚。

關鹽

丁未會勘
程策五

天下有一利焉。即有一害伏之。若其爲利既久。則爲害益多。所貴審利害之宜。而毅然釐剔於其間。則有治人無治法之通論也。如因關立市。煮海爲鹽。非古人抑末適用之初意哉。然居今日。而尙以抑末適用爲言。迂矣。獨是小民以心計博錙銖。上必欲竭其澤而漁之。縱使有裨於國。且不可。何況乎其困。則俱困也。今皇帝撤關差。歸司道。遣巡鹽有專官。似矣。顧關鹽之爲利。雖同。而關鹽之爲害。則異。關唯恐其不聚。鹽唯恐其不散。關唯恐其少所入。鹽唯恐其少所出。任關鹽者。但能上體國。下恤民。而置一己於度外。則其法可久。又不必問其爲部員。爲司道。爲兼攝。爲專官也。今撤者撤矣。撤何意也。曰欲便商。差者差矣。差何意也。曰欲裕課。夫同一官也。或此撤而彼不撤。或彼差而此不差。不深究其積弊所由來。而徒紛紛於更制變法爲竊。恐商仍未便。而便者吏也。課仍未裕。而裕者官也。問撤差之後。積蠹清乎。充蠹止乎。分肥

絕乎知其未必也。問歲差以來。鹽引銷乎。參閏少乎。私販息乎。知其未必也。人以關爲足賦之原。吾以關爲叢奸之藪。人以鹽爲目前網利之階。吾以鹽爲將來必敝之局。何則。官可易。吏必不可除。正課不已。而有常例。常例不已。而有加收。嚴考成。則歸於官。計掊剋。則入於吏。甚且墮其術者。枉法以徇。然前此其權尙重也。自掣肘者多。而悉索益繁矣。關安得不困。額可缺。羨必不可免。商網之外有割沒。割沒之外有包賠。斂有餘。則藏於家。數不足。則委之屬。甚且躁於進者。託溢以獻。然祇此引尙可行也。自盜賣者衆。而官戶益窘矣。鹽安得不困。迨關與鹽俱困。而商不行。商不行。而賦不給。賦不給。而國隨以病。彼權關巡鹽諸臣。獨擁厚貲而坐視。吾不知其意何安也。故欲循已往之規。則雖關差亦可復。欲矯從前之失。則並鹽差亦可裁。而究求其可以經久而無弊者。曰無弊弊者也。則仍不外於有治人無治法之說。爲不易。信不必問其爲部員。爲司道。爲兼攝。爲專官也。

擬上以白糧改折累民仍令全運本色草臣謝表

康熙五年表

伏以鳳詔降黃扉。陰雨靖碩郊之鼠。魴魚甦赤縣。薰風起哀澤之鴻。仁卽寓於賦中。惠而不費。恩恆流於法外。權以爲經。佩聖澤之無疆。歌帝力於何有。臣等竊惟漆林不並園廩。定稅惟期於平準。米粟難兼布繆。起賦應計夫均輸。蓋上下本一體之情。益於上者必損於下。而公私有兩便之道。贏於私者乃奉於公。則壤肇自夏書。九有樂篋篚之便。徹糧詳於周禮。三農慶秉穗之遺。漢文蠲半租。利下要本於仁厚。楊炎行兩稅。便民亦出於權宜。惟上惟下。惟中。此先王之制也。時唯用一緩二。或庸或租。或調。乃後世之條哉。

未免暮四朝三。鬼家令以重粟爲言。蘇長公因錢荒有議。迨至青苗法起。遂爾蒼生禍延。賦慘於蛇。糶新穀。賣新絲。窮屋徒悲夫秋雨。政猛於虎。補不足。助不給。德音未藹於春風。望杏瞻蒲。關頭多輟來之嘆。車轍擔運。室中有懸磬之嗟。牛羊之芻牧。謂何使斯民如此其極也。鴻雁之劬勞已甚。若彼法亦安能久哉。使非值極愛民之朝。何以有不忍人之政。茲蓋伏遇皇帝陛下。功清六合。道穆三台。卻貢頌書。修夏王無間之德。捐租下詔。法姬宗大賚之恩。向以齊晉告饑。已沛宏恩於西北。茲因江浙重困。復灑溝澤於東南。令雖似乎維新。法則依然仍舊。謂催科而征其粟。歲貢之常也。已苦於藏粟無多。若輸納而代以金。民力實竭焉。正恐其點金乏術。西成不足以供賦。勢必指禾而償租。東作未至於逢年。甚且鬻田以辦運。雖前此以輓輸之不易。偶爾改折白糧。當今日而賠累之已深。何妨全運本色。不謀於左右。宸衷獨斷。紫綵遙降於青雲。深酌乎古今。民困重甦。白粲交輸於綠莖。菜色變爲春色。九陌瞻榆柳之新。春聲憶若雷聲。千畦潤桑麻之影。臣等志慙索米。才愧兼金。序蕭相國之運餉功。非所及也。嘗自省於退食。讀鄭監門之流民表。實可傷哉。竊有志於借籌。十日雨。五日風。鼓腹擊康衢之壤。九年耕。三年食。厝火防曲突之薪。在今時固已安而益安。乃吾君尤宜聖不自聖。伏願職道自己。藏富於民。修稼穡之艱難。崇節儉於服御。權貨財之運殖。基宥密於宮庭。因一方思及萬方。普天沐王仁之浩蕩。由一事推及衆事。率土慶庶績之休和。則玉燭常調。玉歷永綿於玉食。而金湯克鞏。金粟常享於金甌矣。

聖人在上以仁育萬物論會試

從來王霸治術之不同。皆肇端於心術。霸者有駕馭一世之權。而王者則唯有胞與一世之量。何也。天下之仕者。皆吾士也。天下之耕者。皆吾氓也。舟車所濟。旁行四海。方制萬里。畫野分州。皆吾臣妾也。卽其間一草一木。一飛一潛。亦莫不於吾有待生之形待成之理。爲上者。苟高居稱朕。清淨無爲。聽世之自爲生成。固不可。卽不然。政以濟之。政煩則擾。法以繩之。法敝則玩。刑以震之。刑甚則離。不爲探本窮源。而有所涵濡漸摩於平日。使熙熙皞皞。上追牖古之遺風。猶非所稱德盛而化神也。旨哉。聖人在上以仁育萬物之言。請得而申論之。聖人者。以天下爲一家者也。聖人之心。以天下爲一體者也。以天下爲一家。則待天下者。卽以待一家之道待之。藹藹然如父子。怡怡然如昆弟。陶陶然如夫婦。一家之情洽。而天下之情洽矣。以天下爲一體。則待天下者。卽以待一體之心待之。耳目順其聰明。手足順其舉止。四肢順其作息。一體之意協。而天下之意協矣。是以堯舜之世。有好生如天之懷。而時雍風動。文武之世。有惠鮮懷保之政。而大定永清。此數聖者。出其才智。非不可以震動斯民。而獨孜孜焉。以仁民愛物爲念。誠以仁愛者政治之本。舍其本而他圖之。是猶雨露不施。而欲草木長養者也。乃後之人君。不知務此。習操切之名。尙申韓之術。以刑名爲道德。以法律爲詩書。始以一念之忍。卒釀數世之亂。相與噲噲說說而不可解。豈非不仁之甚者哉。若聖人在上。則不然。聖人者。天爲萬物而生者也。天爲萬物而生聖人。聖人卽體天以愛萬物。故不忍萬物之失養。則井田以治之。不忍萬物之失教。則學校以導之。不忍奪萬物之命。則常留其有餘。不忍戕萬物之生。則相安於無事。凡所以委曲而安全者。不遺餘力焉。夫而後和氣所鍾。百祥以降。人無

疵厲之虞。物無天札之患。化及於一家。則樂易起於門內。化及於一國。則雍熙著於郊圻。化及於天下。則太和在宇宙間矣。譬之春風一播。而百彙俱昌。旭日始升。而有生成者。以之咸五登三也。寧待問哉。雖然。仁合人己而爲言也。我躬不淑。遑及於物。故仁民者。必先自修其仁始。

宋太宗論

太宗初無篡志也。而其篡成於趙普。嘗考諸史。太祖之待太宗也至矣。金匱藏盟。奉教唯謹。臨第視疾。灼艾分痛。而龍行虎步。太平天子之稱。又對臣下諄諄不置。是太祖能以天下與人。卽堯舜無多讓焉。夫豆羹之賜。人有德色。一飯之施。千金是報。矧天下重器也。天子尊位也。一旦舍子而立弟。爲太宗者。少有人心。亦必鏤心刻骨。沒齒不忘。成盟未寒。天道可畏。豈遂辜德賊恩。如彼其極哉。故卽位之初。卽詔太祖廷美子女并稱皇。以示一體。而又循太祖待己之例。命廷美尹開封。德昭爲節度。恪遵成命。未敢阻越。是知太宗初無篡志也。而世俗以爲篡者。謂燭影斧聲。及宋后之託命。德昭之自刎。不踰年而改名改元數事。爲可疑耳。夫此數事者。實不足以定其罪。何也。方太祖大漸。太宗入侍。天命已定。人望攸歸。所爭直旦晚間耳。何至不能少待。而躬爲大逆。好爲之之說。未必非祕授以下太原收錢塘之計。未可謂篡也。宋后見太宗愕然。遽呼託命。亦孤兒寡婦當國。有大喪危疑之際。慮深而情迫。故不覺其言之妄發。太宗卽泣曰。共保富貴無憂也。遷之西宮。尊爲開寶皇后。未可爲篡也。德昭請太原之賞。因待汝爲之一言。卽退而自刎。以太祖元子而不得其死。事誠慘矣。然太宗君也。父也。以君而責臣。從父而責從子。不能諒其平日

剛烈。出言過當。則有之。若謂欲以一言致之死地。無論德昭未必死。此一言。德昭卽死。而廷美尙存。德芳無恙。世次將及。彼將何辭以謝天下乎。亦未可謂篡也。至不踰年而改名昺。改元太平興國。此則事不師古。不學無術之小疵耳。使其果欲敗盟。則必爲欺世盜名之舉。陰懷叵測。而陽示尊崇。顧乃播諸名號。使天下指而目之。不若是其愚也。亦未可謂篡也。獨至廷美之死。則不能爲太宗解矣。廷美固無罪者也。柴禹錫之告變。盧多遜之交通。趙白樊德明之起獄。此自小人行險僥倖。逢迎構難之常技耳。於廷美何尤。乃讒言一入。信之不疑。罷其府尹。留守西京。可以已矣。而又訐告者擢之。燕犒者黜之。毋乃甚乎。勒歸私第。削其名號。可以已矣。而又降封涪陵。房州安置。毋乃甚乎。蓋此時太宗已有成心矣。踰年而廷美死。誰實死之。雖嗚咽流涕。發哀成服。遂足以謝金匱之成盟乎哉。然嘗考其始終。平心而論。太宗雖寡恩。不若是其極也。他日太子廟見。還京師。民擁道喜躍。帝不懌曰。人心遽屬太子。遂置我何地。陋哉斯言。於其子且然。何有於弟姪。然由此觀之。太宗處心積慮。不過一貪富貴。患得失之鄙夫耳。未必以亂臣賊子自甘也。爾時若有公忠大臣。委曲開牖。告以太后遺命。必不可違。太祖大恩。必不可負。庶幾幡然改悟。而父子兄弟之間。必不至有慚德。及考其訪傳國於趙普。普乃曰。太祖已誤。陛下豈容再誤。嗚呼。自有此言。而廷美死矣。自廷美死於房州。則向日燭影斧聲。及宋后之託命。德昭之自刎。不踰年而改名。改元。彼數事者。雖無意。若有意矣。大義旣絕。逆志已成。比後后崩不成喪。又直視固然。並形迹亦不少避矣。故天下後世無不以篡目之。子輿氏曰。長君之惡其罪小。逢君之惡其罪大。蓋甚之也。君子原情定罪。以爲太宗初無

纂志而成其纂者趙普也。然按以春秋誅心之法。雖直謂太宗之纂也可矣。噫。彼趙普者。既佐太祖負周世宗於前。又助太宗負太祖於後。固小人之尤哉。

府誌總論

廣平當黃農虞夏時。蓋冀州地也。周封建爲晉。三卿瓜分而爲趙。星莖昂畢。北斗主權。皆趙分。漢圖籍篇曰。陰陽之精。本在地。發於天。此天道也。王者受命於天。而辨方定位。或爲國爲郡。爲州爲軍。爲路。則有職方之版籍存。制度考文。與時偕行焉。有時分而他屬者。犬牙相錯。就便近也。今列在畿甸。雖明舊制。屬邑凡九。永年其倚郭焉。田膏腴。食稻羹魚。賦上上。祖已訓曰。天監下民。典厥義。降年有永。有不永。殆此意歟。次曲周。田饒沃。工商販之利。賦上上。邑在二水之曲。漣而周也。故名。次肥鄉。田淤於水。畝倍鍾石。賦上中。相傳爲肥義之采邑。其然乎。抑爾雅所云。水同源異流而復合者也。次雞澤。爲春秋會盟地。田鹹鹵。賦中下。澤水之瀉也。而亦名邱難也者。其有所指耶。不可考矣。次廣平。固與郡同稱也。而古亦間爲郡。田平坦。無灌漑利。賦中中。其必抑而下屬之也。亦地氣之升降使然。次邯鄲。邯山也。邯。彈也。邯之山。彈於此也。田沃衍而又狹。激以水。賦中上。古之大都會。歟。而今也。則爲傳舍。次成安。田斥鹵。多淤淖。雖畝數鍾而賣不直。賦中下。陳餘之遺蹟安在乎。今其間諸水濱矣。次威。田曠莽而多礪砂。賦中下。蓋五達之衝也。而時有伏莽焉。次清河。固故國也。有甘陵在焉。今則彈丸耳。田瘠。賦下。以河名而實無河。僅僅永濟當其衝也。而騷於漕矣。此地勢也。其間聰紫。左護漳滏。石縈紅葛。沙洛之屬。星拱而襟帶。地氣鍾爲靈傑。如頗牧奢勝。

諸人名雖顯猶有霸習。唯李文靖之相業。竇文正之理學。李忠愍之氣節。李高郵之科名。何文憲吳忠簡之經濟。王文忠。元文敏之文章。尤度越焉。而有明制科中。則九尚書十二中丞爲最盛。此人事也。天地與人事相沿。則流而爲風習。而爲俗。雖氣數亦不能與之爭。史記曰。燕趙多慷慨悲歌之士。漢書曰。士廣俗。雜高氣勢。輕爲奸。隋地理志曰。質直。尙儉約。勤稼穡。織紉。宋志曰。地雖斥鹵。人多牧畜。古則然矣。今乃異甚。其儉不中禮。類於晉。遇事有激昂之氣。類於齊。儒者彬彬焉。文采可觀。類於魯。市僧之子。尙騎射而習便利。類於燕。商賈走水陸之利。如驚。類韓衛。其屈強而不馴者。主聲斷而以訟。託爲能。類秦楚。近則雕文刻鏤。曳縞履絲。浸浸乎吳越之風矣。嗚呼。移而易之。因勢而利導之。豈不賴有其人哉。豈不賴有其人哉。

三樹齋語小引

標爲理學名目。自宋儒始。予謂自古眞經濟大文章。何者不自理學中來。如義冠關服。繩趨尺步。遂自命曰理學。則其視理學也亦隘矣。故先伯氏謂宋司馬溫公。明王端毅公。皆理學中人。卽明道晦庵二先生立朝皆表表見諸行事。豈空談性命者哉。吾郡先達蔡公春臺。人皆目爲理學。吾獨深服其守蘇時。近如路見白先生。以名侍御陟開府保障江淮。事功赫濯。人不知其爲理學。卽先生亦未嘗自謂爲理學。及觀三樹齋語。則已挾白鹿之精華。窺紫陽之堂奧矣。嗟乎。五經四書。理學宗傳也。士大夫誰不讀之。而理學家遂欲私爲己有。謂天人性命別有祕傳。欺人亦自欺矣。讀先生語。經濟也。文章也。理學也。夫子曰。吾道一以貫之。可以參矣。

李子靜出使安南序

皇帝御極七載。安南國王黎維禱。擊走物統使莫元清。盡取其高平地。滇粵守土臣具以聞。皇帝不忍加兵。遣侍讀臣李仙根持節往諭之。潁行。同人祖道國門外。見所錫龍旗玉仗。一品緋衣。咸心豔之。余獨引爵前席而言。此萬里行不易。吾輩易地自處。何以不辱命。請各籌畫於杯酒間。於是衆俱離坐。議論風發。或曰。交人井蛙耳。臨以朝廷威靈。將稽顙恐後。或曰。交人素獷悍。慢上無禮。夫豈不知元清爲我服役。今不請於朝而擅加兵。此其意叵測。或曰。往年賜卹賜封。使者兩至其國。彼皆奉命唯謹。何有於今日。或曰。往年異甚。封卹之使。不過成禮而退耳。今彼方忿怒相攻。而我欲以揖讓息其兵戎。於勢爲難。或曰。宜如永樂之命張輔。或曰。宜如宣德之宥黎利。於卽李子獨目笑而不言。衆因引滿進一觴曰。吾子必有成算。將何以不辱命。李子曰。諾。固然。交人雖狡鷲。亦人也。吾情以感之。義以喻之。利害以惕之。庶其悔禍乎。衆於是停杯而願聞教。李子曰。吾始至其國。陳詔書於其庭。呼維禱而前。語以爾王與元清雖同受國命。元清實爾臣也。自登庸篡爾先君應世。爲爾國亂臣。臣無禮於其君。則聲罪而致討之。今王復累世仇。於義誠當然。獨不思莫氏先爾本正朔。故皇帝以爲都統。使居之高平。夫都統旣中國所命。是元清卽王臣也。高平卽王土也。春秋之法。人臣無將。凡諸侯有不請於天王。而擅相征伐者。罪必誅無赦。元清果有罪。爾入貢之使歲遣。何不具表上聞。得請而後發。今乃恃強吞併。兵連禍結。王何明於責元清之爲臣。而自處於不臣也。如謂大復仇之義。不及奏聞。爾黎氏未王以前。彼陳天平父子安在乎。且爾所恃者。不過兵力。